

馬祖熙 編著

陳維崧年譜

九二翁鈔定



上海古籍出版社

馬祖熙 編著

陳維山松年譜

九二為銘定一



上海古籍出版社

圖書在版編目(CIP)數據

陳維崧年譜 / 馬祖熙編著. —上海:上海古籍出版社,
2007. 11

ISBN 978 - 7 - 5325 - 4767 - 8

I. 陳… II. 馬… III. 陳維崧(1625 ~ 1682)—年譜
IV. K825. 6

中國版本圖書館 CIP 數據核字(2007)第 159931 號

陳維崧年譜

馬祖熙 編著

上海世紀出版股份有限公司 出版、發行
上海古籍出版社

(上海瑞金二路 272 號 郵政編碼 200020)

(1) 網址:www.guji.com.cn

(2) E-mail:guji1@guji.com.cn

(3) 易文網網址:www.ewen.cc

新華書店上海發行所發行經銷 上海市委黨校印刷廠印刷
開本 850 × 1156 1/32 印張 6 插頁 2 字數 104,000

2007 年 11 月第 1 版 2007 年 11 月第 1 次印刷

印數:1 - 1,500

ISBN 978 - 7 - 5325 - 4767 - 8

I · 1962 定價:20.00 元

如有質量問題,前與承印公司聯繫

引言

余素喜陳迦陵詞，一九四二年，余公仲詹師在廈門大學教授詞學，因以舊所習作之詞，敦請先生指點。先生謂子所作以沉雄俊爽爲宗，接近陽羨詞人風格。因代借《湖海樓全集》，囑余作深入之研究，復勉余曰：「歷代著名文人，多有年譜，獨缺迦陵。子可積累素材，分年紀錄，爲試作迦陵年譜創造條件。」又言：「迦陵詩文詞俱工，在當時爲名家。詞及駢文尤爲傑出。綜其一生，除國變前以貴家子弟身份，得享有優裕之家庭及師長教育，打定文學基礎而外，其餘時間，遭逢世變，孤危拓落。中年以後，乞食四方。迨至晚年，雖得應試鴻博，黽勉一官，而窮困如故。終乃歿於官所，無以爲葬。才高命蹇，良可痛也。」余謹記師言，因據手口材料，作迦陵編年卡片，隨時紀錄其經歷情況，以爲作年譜之準備。離廈大後，因生活所累，工作場所頻年更換，舊稿多荒置篋中，未遑整理。新中國成立後，任教宣城中學。始於工作之暇，得閱迦陵文集、迦陵駢體文集。又於安徽大學、省圖書館借得《宜興縣志》、《宜興舊志》等書，輯錄有關資料。又二十年，得於上海重晤施師蟄存。一九八三年值陳維崧逝世三百周年之期，施老所編之《詞學》，載余所作《論迦陵詞》一篇，以爲紀念。又於一九八五年，施老主編之《江西百花洲文


庫》第四輯，列入余所輯之《迦陵詞選箋注》一編。施老知余平昔有志作陳維崧迦陵先生年譜，因勉余曰：「子研究陳其年著作有年，比較熟知其一生之梗概，可完成年譜之著，以遂夙願。」經蟄公指示，至一九八七年，余勉成《陳維崧年譜》一稿。蟄公披覽一過，以爲可用。於是鈔寫複印成冊，今此稿行將付梓，而仲詹師作古已近六十年，蟄公辭世亦近三載。回思兩師往昔教誨之情，不禁泫然久之。因述此編著錄之緣由，用代引言。深望當代賢達，不吝指正，以匡余之不逮，則幸甚矣。

二〇〇六年十月一日 緝庵馬祖熙

世系表（據《重刊宜興舊志》、《清史稿》、《迦陵文集》等書編錄）

陳維崧其年自述其先世云：

「自宋大儒止齋公（陳傅良）居永嘉，自永嘉徙義興，生倉四公，倉四公生四子，五傳至衛輝丞弘甫公，由湖南徙亳村，又五傳生耕隱公遠。耕隱公以名德重一時，文待詔嘗作樂耕圖贈之，並繫以詩，有『舊說子真矜谷口，今輸元亮傲柴桑』之句。耕隱公生思堂公邦，為桐廬丞。思堂公生古愚公憲章，古愚公生懷古公一經。」憲章即維崧之高祖。



世系表

陳憲章字古愚。以孫于廷秩贈左都御史，妻陳邵氏，年二十四寡，時有娠，後生一經，卒年七十四，以孫于廷顯貴，贈夫人。

一經字懷古。諸生，以子于廷秩封監察御史，贈左都御史。

于廷字孟諤。萬曆二十三年進士，官至左都御史，少保，為東林黨中堅人物，事詳

《明史》本傳。生於嘉靖四十五年丙寅（一五六六），卒於崇禎八年乙亥（一六三

五）。為人尚風節義，端亮有守。貞貽字孫謨。邑文學，為文放筆千言，覃精理學，纂錄《大全性理》、《蘇長公文腴》等書數十萬言。遭母喪哀毀，尋卒。

貞裕天啟四年舉人，早卒。


貞達字則兼。以父于廷蔭戶部主事、順天府知府，明亡殉難。妾陳王氏，夫死難，闔家自焚死。

維岱字石間。父殉難悲憤，終生不求進仕。工詩文，與從兄維崧、維岳酬唱最富。

宗大以祖父于廷蔭戶部主事。

時英字世求。諸生。

真慧字定生，崇禎三年副榜，曾與吳應箕、顧杲共草「留都防亂揭」，聲討阮大鍼。明亡，足迹不至城市者十二年。《清史稿》卷二八八《遺逸》有傳。生於萬曆三十二年甲辰（一六〇四）十二月初九日，卒於清順治十三年丙申（一六五六）五月十九日。以長子維崧秩贈翰林院檢討，以四子贈戶部主事。



傳 略

陳維崧（一六二五——一六八二）字其年，江蘇宜興人。

《清史稿》列傳二百七十一《文苑·陳維崧傳》：「陳維崧，字其年，宜興人。……清臞多鬚，海內稱陳髯。」

《宜興舊志》卷八《文苑·陳維崧傳》：「陳維崧，字其年。貌清臞多鬚，海內號爲陳髯。」《國朝先正事略》卷三十九《文苑·陳維崧傳》：「陳維崧，字其年，號迦陵，以明末天啟五年生。父貞慧，明末著氣節。維崧少負才名，冠而多鬚，浸淫及顛準，陳髯之名滿天下。」

祖父于廷，明左都御史，太子少保，東林黨魁，爲人「端亮有守」。

《明史》卷二百五十四《陳于廷傳》：「陳于廷，字孟諤，萬曆二十三年進士。歷知光山、唐山、秀水三縣。徵授御史，……光宗立，擢太僕少卿，徙太常。議紅丸事，極言崔文昇、李可灼當斬。尚書王紀被斥，特疏申救。再遷大理卿戶部右侍郎。改吏部，進左侍郎。尚書趙南星既逐，于廷署事。大學士魏微傳魏忠賢意，欲用其私人代南星，且許擢于廷總憲。于廷不可，以喬允昇、馮從吾、汪應蛟上。忠賢大

怒，謂所推仍南星遺黨，矯旨切責，並楊漣、左光斗斥爲民。文選郎張光前、御史袁化中、房可壯亦坐貶黜。自是清流盡逐，小人日用事矣。崇禎初，起南京右都御史，與鄭三俊、京察，盡去諸不肖者。南御史差竣，例聽北考。于廷請先考于南，報可。召拜左都御史。以巡方責重，列上糾大吏、薦人才、修荒政、覈屯鹽、禁耗羨、清囚獄、訪豪奸、弭盜寇八事，請於回道日核實課功。優詔褒納。給事中馬思理、御史高倬、余文縉坐事下吏，並抗疏救之。秩滿，加太子少保，三疏乞休，不允……後以（擬罪上疏）所援引悉不當帝意，疏三上三卻，竟削籍歸。家居二年卒。于廷端亮有守，周延儒當國，于廷其里人，無所附麗。與溫體仁不合，故卒獲重譴去。」

父貞慧，于廷季子。復社名士，「東林四公子」之一。明末以氣節著稱。嘗與吳應箕、顧杲爲「留都防亂揭」，發魏忠賢餘黨阮大鍼奸狀。南都陷，屏居土室，以逸民終。

《清史稿》卷五百零一，《遺逸·陳貞慧傳》：「陳貞慧，字定生，宜興人，明都御史于廷子，于廷東林黨魁。貞慧與吳應箕草『留都防亂揭』擯阮大鍼。黨禍起，逮貞慧至鎮撫司。事雖解，已瀕十死。國亡，埋身土室，不入城市者十餘年。遺民故老，時時向陽羨山中問生死，流連痛飲，驚離吊往，聞者悲之。」

《宜興舊志》卷八《隱逸·陳貞慧傳》：「陳貞慧，字定生，少保于廷季子。崇禎三年副榜。十一年，與顧杲、吳應箕爲『留都防亂揭』，發阮大鍼奸狀。大鍼聞之，恚曰：『彼何人？必欲殺余！』及福王

立，大鉞修出揭之怨，首下周鑣於獄。時貞慧爲父請卹，留南都，旦夕問鑣，大鉞遂誣以爲鑣行賂。出一票，但曰：「駕上來，蜂擁之去。」商丘侯方域出囊中金付錢禧，賂緹騎鎮撫，而自爲求援於兵部侍郎練國事。漏已下，國事馳詣馬士英曰：「書生何罪？必致之死！」士英曰：「意出圓老。」國事曰：「其先人清德重望，當十世宥之，奈何遽殺其子！」士英默然，顧燭影移時曰：「繫之何如？」國事不答。「遣之出境何如？」乃謝而退。舊錦衣劉僑、大學士王鐸亦致書鎮撫。鎮撫臨鞠佯作色，終無所鍛鍊。士英亦緩之，得放回。大鉞切齒曰：「待我巡視地方，未晚也！」會國亡，大鉞走死。貞慧自是屏居故里，坐臥一小樓，哀集先世傳誌銘贊、己所往來贈答詩古文，授子維崧，足迹不入城市者十二年而卒。」

《清史稿》卷五百〇一《隱逸·冒襄傳》：「冒襄，字辟疆，如臯人。……與桐城方以智、宜興陳貞慧、商丘侯方域稱『四公子』。」

維崧天資絕豔，六歲時，陳子龍遊宜興，貞慧延子龍爲維崧啓蒙師。其後才思日進。方十歲，代祖父撰《楊忠烈像贊》，文殊可觀。

《宜興舊志》卷十《僑寓》：「陳子龍舉鄉試，遊宜興，寓陳貞慧家，貞慧延子龍爲維崧啓蒙師，住宜興一月餘。」陳子龍（一六〇八——一六四七）字臥子，華亭（今松江）人。崇禎丁丑進士，仕紹興推官，擢兵科給事中。南部陷，曾起兵抗清。永曆元年以發動吳勝兆等結兵太湖舉義事泄，被執不屈，乘間赴水殉節。

《迦陵儷體文集》卷十《楊忠烈像贊》（代大父少保公）：「江河緯地，日月經天。誰其參之，曰維聖賢。有明御宇，兩楊媿哲，前爲忠愍，後爲忠烈。嗚呼忠烈，秉國之綱。英風毅骨，千載芬芳。越稽光宗，庚申之際，鼎湖昇天，實公是恃。越稽熹廟，踐祚之秋，撤簾即位，實公是謀。協律小侯，延年女弟，誰在椒房，曰李選侍。西園校尉，北府侍中，誰掌貂璫，曰魏進忠。故劍雖嗚，遺簪莫惜。移宮一疏，列宗動魄。五侯輩下，七貴長安。二十四罪，宵人膽寒。嗚呼忠烈，忠構身禍，鍛煉熊、王，深文楊、左。棘亭鎖鑰，北寺銀鑰。誰收李固？孰訟王章。衣冠之禍，劇於嬖聖，六月飛霜，白虹貫井。嗚呼忠烈，涿鹿之濱。蕭蕭策蹇，維予三人。應山桐城，留丹化碧，余獨何人，鬚髯如戟。聖人褒卹，炳烺乾坤，老臣拜頌，聊闡忠（貞）。」

《迦陵詞全集》卷二十四《沁園春·桐川楊竹如刺史招飲劇演黨人碑即席有作》詞原注云：「竹如係忠烈公家孫。黨人碑，宋元祐紹聖事。」又云：「忠烈遺像，存余家三十年矣，今始奉還。」

十五歲，隨父寓金陵，師事吳應箕。

《迦陵文集》卷二《留都見聞錄序》：「余年八九歲，祖父挈來金陵，僦宅成賢街蓮花橋下。後隨先大人省試，率三歲一至以爲常。其最盛莫如己卯、壬午兩年。己卯（一六三九）寓深陽宋憲副鳴天別館，是歲遂遊樓山夫子之門，夫子則寓鄒滿子閣子。」

吳應箕（一五九四——一六四五）字次尾，號樓山，貴池人。崇尚氣節，爲復社名士。弘光元年五月，南都傾覆，起兵應金聲，敗走山中，殉節。《殷頑錄》：「次尾，鄉副榜。」

復以詩文詞爲前輩所稱賞。

《迦陵文集》卷一《宋楚鴻古文詩歌序》：「向者，余亦年十五，李舍人適陽羨，余出《昭君曲》示之，徘徊歎賞不去口實。既又飛書會稽陳黃門，實有潘江之目。」（李舍人謂李雯，陳黃門謂陳子龍）

李雯（一六〇八——一六四七）字舒章，華亭人。少與陳子龍、宋徵輿齊名，稱「雲間三子」。順治初，仕清爲弘文院中書舍人。順治四年卒。

《迦陵文集》卷四《上龔芝麓先生書》：「維崧，東吳之年少也。才智誕放，骨肉醜脫，當塗貴遊，目之輕狂。向者，粗習聲律，略解組織，雕蟲末技，猥爲陳黃門、方簡討、李舍人諸公所品藻。」（方簡討謂方以智）

方以智（一六一一——一六七二）字密之，桐城人。崇禎庚辰進士，授翰林院檢討。入清爲僧，名弘智，字無可，一名藥地。有《浮山全集》。所著《通雅》，論者謂精審在楊慎、陳耀文、焦竑三家之上。吳璠《迦陵詞跋》：「先生生而穎異，少爲黃門、舍人、樓山、吉士（錢禧字）諸前輩所賞識。」

陳宗石《湖海樓詩跋》：「伯兄生而穎異，五六歲即能吟，吟即成句。先大父暨先大人鍾愛之。甫

齟齬，爲延貴池吳次尾、吳門錢吉士兩先生教之，兩先生交口贊。先大人遊金陵，同時則有周仲馭（鑣）、方密之（以智）、張芑山（爾公）、沈眉生（壽民）、顧子方（杲）、冒辟疆（襄）、梅朗三（朗中）諸先生，子外舅侯公朝宗。先大人讀書吳門，則有文相國湛持、侯銀臺廣成、徐宮詹九一、陳黃門大樽、張太史天如、李舒章、楊維斗、黃梨洲諸先生周旋贈答。時伯兄髮始覆眉，咸隨侍側，聆諸先生議論，益刻意爲詩，爲諸先生所賞識。」

崇禎辛巳（一六四一），維崧年十七。應童子試，何明瑞在陽羨令幕中，拔置第一。

《迦陵詞》卷十一《滿江紅》（何明瑞先生筵上作）「陽羨諸生」原注云：「辛巳歲，先生在陽羨令幕中，拔余童子試第一。」何明瑞，爵里待考。

國變之後，遭境坎坷，隨父居鄉里。丙申（明永曆十年，清順治十三年）五月，父貞慧以悲憤積鬱逝世，家益落。維崧曾兩應鄉試，俱報罷黜，乞食四方。始則徘徊於如皋、揚州間，繼又落魄於京門，徬徨於中州，嗣又隱淪於故鄉，境愈困，而詩文詞愈進，當世幾無不知陽羨陳髯者。

《湖海樓詩集》卷一《癸卯將發如臯留別冒巢民先生》詩有「嗟余業未精，歲月忽以逝。兩戰兩不收，霜蹄一朝蹶」之句，知曾兩次應鄉試。

《迦陵文集》卷一《張孺子詩序》：「庚子（順治十七年）秋，陳生年三十六，下第不能歸，復佯狂而遊於如臯。」指第二次落第，其第一次落第當在丁酉（一六五七）年。兩次應試，皆在其父貞慧去世之後。案：康熙二年癸卯（一六六三）秋，維崧與曹亮武同來金陵，似亦爲就省試而發。其酬別渭公（曹亮武字）詩有「亂世功名同濩落」之語。方文于本年贈陳其年詩亦有「今秋逐隊來，青溪訪舊識」之句，果否與試，有待考證，因維崧其他詩文詞中，皆未提及癸卯年曾應鄉試。

維崧於順治十五年戊戌十一月，始至如臯，其後來往於如臯、揚州間者約十年。康熙七年戊申（一六六八）夏末至京師依龔鼎孳，時鼎孳任禮部尚書。羈留數月，暮秋南行往中州。在中州前後約四年許。康熙十二年癸丑（一六七三）至十六年丁巳（一六七七）期間，除十四年乙卯又一度于夏秋間至中州外，其餘時間大多在宜興故鄉及江南各地，其行蹤梗概，大抵從詩、文、詞中所記者可以知之。

維崧詞嗣響蘇辛，悲涼雄肆，骨力勁道，氣魄絕大，填詞之富，古今無兩，且壯柔並用，長短俱工。詩亦英偉磊落。又工儷體，所作高華瞻麗，灼采流光。而亡國之痛，身世之感，亦深寓於詩、文、詞中。然詩名爲詞所掩，文名爲儷體所掩。

《清史稿》卷四百八十四《陳維崧傳》：「比長，侍父側，每名流讎集，援筆作序記，千言立就，瑰偉無比。皆折行輩與交。」嘗由汴入都，與朱彝尊合刻一稿，名《朱陳村詞》。流傳至禁中。」詩宏麗沉鬱，

詞至千八百首之多，尤前此所未有也。」《宜興舊志·陳維崧傳》：「順治九年（明永曆六年，一六五二）蘇常四郡興同聲社，名士畢集，觴酌未引，維崧索筆賦詩數十韻，用六朝體作序，頃刻千言，諸名士驚以爲神。」又云：「所著《湖海樓集》四十二卷，詩馳驟李杜間，詞尤凌厲光怪，變化若神，富至千八百首。」

蔣景祁《陳檢討詞序》：「讀先生之詞者以爲蘇辛可，以爲溫韋可，以爲《左》、《國》、《史》、《漢》、《唐》宋諸家之文亦可。蓋既具什伯衆人之才，而又篤志好古，取裁非一體，造就非一詣，豪情豔趣，觸緒紛起，而皆含咀醞釀而後出。以故履其闕賞心洞目，接應不暇；探其奧，乃不覺晦明風雨之真移我情，噫！其至矣！」

高佑鉅《迦陵詞全集序》云：「其年先生縱橫變化，無美不臻。銅軍鐵板，殘月曉風，兼長並擅，其新警處爲古人所不經道，是爲詞學中絕唱。」

吳璠《迦陵詞全集跋》云：「（先生）與梅村（吳偉業）、合肥（龔鼎孳）、西樵（王士禛）、阮亭（王士禛）、宇台（孫治）、文友（董以寧）、程村（鄒祇謨）諸先生相倡和，無不唱爲驚才絕艷。……詩餘最富，蓋千餘闕云。靈思杳忽，蘸墨欲飛，隨筆所之，天機鏗錫。凡可歌可泣者胥寓於詞，洵飄飄然空前而絕後矣。」

陳宗石《迦陵詞全集跋》云：「伯兄之詞富矣，伯兄之遇窮矣。方伯兄少時，值家門鼎盛，意氣橫

逸，謝郎捉鼻，麈尾時揮，不無聲華裙履之好，故其詞多作旖旎語。迨中更顛沛，饑驅四方，或驢背清霜，孤篷夜雨；或河梁送別，千里懷人；或酒旗歌板，須髯奮張；或月榭風廊，肝腸掩抑；一切詼諧狂嘯，細泣幽吟，無不寓之於詞。甚至俚語巷談，一經點化，居然典雅。真有意到筆隨、春風物化之妙。」

楊芳燦《納蘭詞序》云：「倚聲之學，國朝爲盛，文人才子，磊落間起，詞壇月旦，咸推朱、陳二家爲最……陳詞天才豔發，辭鋒橫逸，蓋出人北宋歐、蘇諸大家。」

譚獻《篋中詞》云：「錫鬯、其年出，而本朝詞派始成，顧朱傷于碎，陳厭其率，流弊亦百年而漸變。錫鬯情深，其年筆重，固後人所難到，嘉慶以前，爲二家所牢籠者十居八九。」

陳廷焯《白雨齋詞話》卷三云：「國初詞家，斷以迦陵爲巨擘，後人每好揚朱而抑陳，以爲竹垞獨得南宋真脈，嗚呼！彼豈真知有南宋哉！」「迦陵詞氣魄極大，骨力絕道，填詞之富，古今無兩；只是一發無餘，不及稼軒之渾厚沉鬱，然在國初諸老中，不得不推爲大手筆。」「迦陵詞沉雄俊爽，論其氣魄，古今無敵手，若能加以渾厚，便可突過蘇、辛，獨步千古，惜哉！」「蹈揚湖海，一發無餘，是其年短處，然其長處亦在此。蓋偏至之詣，至於空前絕後，亦令人望而卻走，其年亦人傑矣哉！」「其年諸短調，波瀾壯闊，氣象萬千，是何英勇！」

朱孝臧《彊村語業》卷三題迦陵詞云：「迦陵語，哀樂過人多。跋扈頗參青兕意，清揚恰稱紫雲歌，